

1 Korin

Pas Pol i raitim long sios i stap long
taun Korin.

Tok Pisin ©2015 J Glenn Calderwood
www.pngbiblesources.org

1 Korin

Pas Pol i raitim long sios i stap long taun Korin.

1 ¹ Mi Pol mi raitim dispela pas. Long laik bilong Em, God i bin singautim mi, bai mi i stap aposel bilong Krai Jisas. Brata bilong yumi, Sostenes, i helpim mi long raitim dispela pas.

² Mi salim dispela pas i go long sios bilong God long siti Korin; mi salim i go long yupela i kamap stretpela long wok bilong Krai Jisas. God i singautim yupela, bai yupela i stap holi lain bilong Em wantaim olgeta manmeri long olgeta hap i bilipim na trastim nem bilong BIKPELA Jisas Krai bilong yumi. Em i BIKPELA bilong ol na bilong yumi wantaim.

³ Mi laik grasia na pis bilong God, Papa bilong yumi, na BIKPELA Jisas Krai, i stap wantaim yupela.

Pol i tok tenkyu long God.

⁴ Olgeta taim mi tok tenkyu long God bilong mi long yupela. Long wanem, long rot bilong wok bilong Krai Jisas God i bin givim grasia long yupela. ⁵ Long rot bilong wok bilong Krai Jisas God i bin mekim yupela rits long olgeta samting, long ol toktok na long trupela save.

⁶ Long dispela pasin God i konfemim gutnius bilong Krai namel long yupela. ⁷ Em olsem na yupela i no sot long wanpela strong bilong Holi Spirit na yupela i wetim taim BIKPELA bilong yumi Jisas Krai i kamap ples klia. ⁸ Na God bai holim na lukautim yupela tu i go i go inap long pinis bilong olgeta samting, bai yupela i no gat asua long de bilong BIKPELA bilong yumi Jisas Krai. ⁹ God Em i feitful, na em i God i bin singautim yupela long kam pas long PIKININI bilong Em, Jisas Krai.

Toktok i brukim sios.

¹⁰ Ol brata na sista, long nem bilong BIKPELA bilong yumi Jisas Krai, mi laik tokim yupela, plis, yupela mas i stap wanbel wantaim, bai yupela no ken i bruk nabaut na yupela ken i pas gutpela tru long

wanpela tingting na long wanpela skelim. ¹¹ Ol brata na sista bilong mi, sampela manmeri long hauslain bilong Kloe ol i tokim mi olsem, i gat tok pait i stap namel long yupela. ¹² Mi minim olsem, sampela manmeri i tok, "Mi bihainim Pol." Na sampela i tok, "Mi bihainim Apolos." Na sampela i tok, "Mi bihainim Sifas." Na sampela i tok, "Mi bihainim Kraiss." ¹³ Kraiss Em i bruk hap hap, a? Na Pol em i dai long diwai kros bilong yupela, a? Na yupela kisim baptais long nem bilong Pol, a? ¹⁴ Mi tenkyu long God mi no baptaisim ol yupela. Krispus na Gaius tasol mi baptaisim. ¹⁵ Olsem na wanpela man i no inap i tok, "Yupela kisim baptais long nem bilong Pol." ¹⁶ (Na mi baptaisim ol femili bilong Stefanus tu. Mi baptaisim ol narapela manmeri o nogat, mi lusim tingting pinis.) ¹⁷ Long wanem, Kraiss i no salim mi bilong baptaisim ol manmeri. Nogat. Em i salim mi bilong autim gutnius. Na Em i no tokim mi long yusim save bilong ol man bilong autim toktok. Long wanem, nogut diwai kros bilong Kraiss i lusim pawa.

Kraiss Em i trupela save na pawa bilong God.

¹⁸ Em olsem na tok bilong diwai kros em i longlong tok long ol manmeri i lus, tasol bilong mipela God i sevim, tok bilong diwai kros em i pawa bilong God. ¹⁹ Tok bilong God i tok olsem,

*"Mi bai distroim save bilong ol saveman,
na Mi bai kapsaitim kleva bilong ol man i gat kleva." (Aisaia 29:14)*

²⁰ Na saveman i olsem wanem? Na man i skul long olgeta samting i olsem wanem? Na man i toktok planti long ol skelim bilong em i olsem wanem? God i bin mekim olgeta save bilong dispela graun i longlong save tasol. ²¹ Long trupela save na plen bilong God, ol manmeri ol i no kisim save long God long rot bilong save bilong dispela graun. Nogat. God i amamas long sevim manmeri i bilip long rot bilong longlong tok mipela i save autim. ²² Ol Juda i laik lukim ol sain, na ol Grik i laik kisim ol save, ²³ tasol mipela i pris long Kraiss i dai long diwai kros. Dispela tok i rabis toktok long ol Juda, na ol Grik i tingim dispela tok i longlong. ²⁴ Tasol bilong mipela God i bin singautim, mipela Juda na mipela Grik wantaim, Kraiss Em i pawa bilong God na Em i trupela save bilong God.

²⁵ Long wanem, longlong bilong God em i winim save bilong ol man, na wik bilong God em i winim strong bilong ol man.

²⁶ Ol brata, yupela mas tingim taim God i bin singautim yupela. Long wanem, taim God i singautim yupela, orait i no gat planti bilong yupela i stap saveman long ai bilong ol man bilong dispela graun, na i no gat planti bilong yupela i gat strong, na i no gat planti bilong yupela i bilong ol femili i gat nem. ²⁷ Tasol God i makim ol manmeri i longlong long ai bilong ol manmeri bilong dispela graun. God i makim ol manmeri i wik bilong semim ol manmeri i strong. ²⁸ God i makim ol manmeri i no gat nem na i rabis samting long ai bilong ol manmeri bilong dispela graun. Em i makim manmeri i stap samting nating long dispela graun. ²⁹ God i mekim olsem, bai i no gat wanpela manmeri i ken i apim em yet long ai bilong God. ³⁰ God yet Em i as tru bilong laip bilong yumi i pas long Krai Jisas, na bilong yumi God i mekim Krai Jisas i kamap trupela save bilong Em. Em olsem na Krai Jisas Em i stretpela pasin bilong yumi, na long wok bilong Em yumi kamap holi manmeri bilong God, na Em i rot bilong God i kisim bek yumi. ³¹ Long dispela as, na Tok bilong God i tok pinis olsem, "*Sapos yu laik litimapim na trastim nem bilong wanpela samting, orait yu litimapim na trastim nem bilong BIKPELA tasol.*" (Jeremaia 9:24)

Pol i autim tok bilong Krai i dai long diwai kros.

2 ¹ Na mi, taim mi bin kam long yupela, ol brata, mi no yusim ol kankain naispela toktok na ol kankain save bilong autim tok bilong God. ² Long wanem, mi bin wokim disisen olsem, taim mi i stap wantaim yupela, orait mi no ken i bisi long ol sampela samting, nogat, mi mas bisi long Jisas Krai na dai bilong Em long diwai kros tasol. ³ Taim mi bin kam long yupela, mi no gat strong na mi pret na mi guria planti. ⁴ Na toktok mi autim na pris bilong mi, mi no mekim long ol kankain save na long ol kankain naispela toktok. Nogat. Mi mekim bai pawa bilong Holi Spirit yet i kamap ples klia tasol. ⁵ Long wanem, mi no laik bilip bilong yupela i sanap long save bilong man. Mi laik bilip bilong yupela i sanap long pawa bilong God.

Trupela save i kam long Holi Spirit.

⁶ Em olsem, tasol, bilong ol manmeri i bikpela pinis long tok bilong God, tok mipela i autim em i trupela save. Trupela save mipela i autim em i no olsem save bilong dispela graun na em i no olsem save bilong hetman bilong dispela graun. Ol dispela samting i no inap i stap na i wok long lus. ⁷ Mipela i autim trupela save bilong God. Trupela save em i hait toktok bilong God, na pastaim Em i no putim long ples klia. Tasol taim dispela graun i no kamap yet, God i makim trupela save em i rot bilong kisim mipela i kam long glori. ⁸ Ol hetman bilong dispela graun ol i no klia long dispela samting. Sapos ol i klia, orait ol i no inap nilim BIKPELA bilong glori long diwai kros. ⁹ Tasol, Tok bilong God i tok olsem,

*"Wanpela ai em i no bin lukim,
na wanpela ia em i no bin harim,
na wanpela bel em i no kamapim tingting
long ol samting God i wokim bilong ol manmeri i lavim Em." (Aisaia 64:4)*

¹⁰ Tasol God, long wok bilong Holi Spirit, Em i bin soim mipela.

Na Holi Spirit i save lukim olgeta samting, na Em i lukim olgeta samting i dip tumas bilong God. ¹¹ Husat i ken i save long tingting bilong wanpela man? Spirit bilong em yet i stap insait long em, em tasol em i ken i save. Na wankain olsem, wanpela man i no inap save long tingting bilong God. Nogat. Spirit bilong God yet, Em tasol Em i ken i save.

¹² Em olsem na mipela no bin kisim spirit bilong dispela graun. Nogat. Mipela i bin kisim Spirit i kam long God yet, bai mipela ken i klia long ol samting God i givim fri long mipela. ¹³ Na mipela i autim dispela samting tasol. Mipela no yusim toktok ol saveman bilong dispela graun i lainim mipela. Nogat. Mipela yusim toktok Holi Spirit i bin lainim mipela. Mipela yusim tok bilong Holi Spirit bilong tisim ol trupela tok bilong Holi Spirit.

¹⁴ Man i no gat Holi Spirit, em i no inap bilipim ol samting bilong Spirit bilong God. Long wanem, long tingting bilong em ol dispela samting em i longlong samting. Na em i no inap save long ol dispela samting bikos Holi Spirit i no stap long em na bai em i ken i skelim.

¹⁵ Man i gat Holi Spirit em i ken i skelim olgeta samting. Tasol man i no gat Holi Spirit em i no inap skelim man i gat Holi Spirit.

¹⁶ *"Long wanem, husat i save tru long bel na tingting bilong Bikpela? Na husat bai skulim Em?" (Aisaia 40:13)*

Tasol tingting bilong Krai i stap long mipela.

Toktok i brukim sios.

3 ¹ Na mi, ol brata, taim mi stap wantaim yupela, em i hat long mi autim tok long yupela olsem yupela i brata i gat Holi Spirit. Yupela i stap olsem ol man bilong dispela graun, na yupela i olsem bebi tasol bilong Krai. ² Toktok mi autim long yupela i olsem susu long yupela, na i no olsem strongpela kaikai. Long wanem, yupela no redi bilong kisim strongpela kaikai. Na stil yupela no redi. ³ Long wanem, stil yupela bihainim ol pasin bilong dispela graun. Yupela save jelas na tok pait. Em olsem na yupela i stap olsem yupela i manmeri bilong dispela graun. Yupela wokabout olsem ol manmeri bilong dispela graun. ⁴ Wanpela bilong yupela i tok, "Mi bihainim Pol." Na narapela bilong yupela i tok, "Mi bihainim Apolos." Taim yupela mekim dispela kain pasin, orait yupela wokabout olsem yupela manmeri bilong dispela graun.

⁵ Tingim. Apolos em i wanem samting? Pol em i wanem samting? Mitupela i wokman tasol na rot yupela i bin kisim bilip. Mitupela i mekim wok tasol inap long wok BIKPELA i bin skelim long mitupela. ⁶ Mi bin planim sit, na Apolos i bin givim wara, tasol God i mekim em i gro. ⁷ Em olsem na man i planim sit em i samting nating na man i givim wara em i samting nating. God i mekim samting i gro Em tasol i gat namba. ⁸ Man i planim sit na man i givim wara tupela i gat wanpela tingting tasol, na tupela bai lukim kaikai inap long wok em i bin mekim. ⁹ Em olsem na mitupela wantaim i wokman bilong BIKPELA. Na yupela i gaden bilong God, na yupela i haus God i wokim.

¹⁰ Long grasia God i bin givim mi, mi mekim wok olsem wanpela het bilda i gat save na mi slipim as ston. Na narapela man i wok long sanapim haus long em. Man i wokim wok em i mas lukaut gut long hau em i mekim wok. ¹¹ Long wanem, wanpela as ston i stap tasol na dispela

as ston em i Jisas Krai. Wampela man i no ken i slipim narapela as ston. ¹² Na sapos wampela man i wok long sanapim haus antap long as ston na em i yusim gol o silva o ol daimon samting o diwai o gras o stik bilong wit, ¹³ orait wok bilong em bai kamap ples klia. Long wanem, De bilong BIKPELA bai putim long ples klia, na dispela De bai kamap ples klia wantaim paia, na paia bai traिम wok bilong ol wan wan man. ¹⁴ Sapos samting em i bin wokim i winim paia, orait em bai lukim kaikai bilong wok bilong em. ¹⁵ Tasol sapos paia i kukim samting em i bin wokim, orait wok bilong em i lus. Man yet bai i stap seif, tasol em bai i stap olsem man i eskep long paia.

¹⁶ Ating yupela no save, yupela i tempel bilong God na Spirit bilong God i stap insait long dispela tempel. ¹⁷ Sapos wampela man i distroim tempel bilong God, orait God bai distroim em. Long wanem, tempel bilong God em i holi, na yupela em i dispela tempel.

¹⁸ Yupela no ken i giamanim yupela yet. Sapos wampela bilong yupela i kisim save bilong dispela graun na em i tingim em i saveman, orait em i mas lusim na kamap longlong, bai em i ken i kisim trupela save. ¹⁹ Long wanem, save bilong dispela graun em i longlong samting long ai bilong God. Tok bilong God i tok olsem, "*Em i holim ol saveman long save bilong ol yet.*" (*Job 5:13*) ²⁰ Na i tok moa olsem, "*BIKPELA i klia olsem, tingting bilong ol saveman em i samting nating.*" (*Buk Song 94:11*) ²¹ Olsem na, yupela no ken i apim ol man! Long wanem, olgeta samting em i bilong yupela. ²² Pol na Apolos na Sifas na dispela graun na laip na dai na nau na bihain, olgeta i bilong yupela tasol, ²³ na yupela i bilong Krai, na Krai Em i bilong God.

Wok bilong aposel.

4 ¹ Yupela mas bihainim tingting olsem, mipela wokman bilong Krai na long han bilong mipela God i putim hait toktok bilong Em. ² Na sapos bosman i putim samting long han bilong wokman, orait wokman i mas i stap feitful long dispela samting. ³ Yupela i laik skelim mi o wampela kot bilong dispela graun i laik skelim mi, dispela em i samting nating tumas long mi. Na mi no save skelim mi yet. ⁴ Mi no tingim olsem mi gat rong, tasol dispela i no minim olsem mi no gat asua.

Em i BIKPELA i save skelim mi. ⁵ Long dispela as yupela no ken i skelim samting paslain long taim bilong em. Yupela wetim kambek bilong BIKPELA tasol. Ol samting i hait long tudak BIKPELA bai kisim i kam long tulait na Em bai putim ol tingting bilong bel bilong man long ples klia. Long dispela taim ol wanwan wokman i ken i lukim amamas bilong God.

⁶ Ol brata, mi mekim dispela tok i holim mi wantaim Apolos. Mi mekim olsem bilong helpim yupela, bai yupela i ken i lainim long mitupela as bilong dispela toktok, "Yupela no ken i kalapim toktok God i bin raitim." Em olsem na yupela no ken i bikhet na fevoritim wanpela man na daunim narapela. ⁷ Yu husat na yu tingim olsem yu winim narapela manmeri? Yu kisim wanem samting na God i no bin givim dispela samting long yu? Na sapos God i givim dispela samting long yu, long wanem as yu apim yu yet olsem yu yet i kamapim dispela samting?

⁸ Ating yupela i kisim pinis olgeta samting yupela i laik kisim, a? Ating yupela inap pinis, a? Ating yupela i kamap pinis long kingdom, na mipela nogat, a? Tru tumas, mi laik kingdom i kamap, bai mipela i sindaun long em wantaim yupela! ⁹ Tasol mi tingim olsem, God i sanapim mipela ol aposel las tru long ai bilong ol manmeri, wankain olsem ol i sanapim ol man ol i laik kilim i dai long arina. God i mekim mipela i stap ples klia long ai bilong olgeta samting, bai ol ensel wantaim ol manmeri i lukim. ¹⁰ Mipela i stap ol ful bilong Krais, tasol yupela i stap ol saveman long Krais. Mipela i wik, tasol yupela i gat strong. Yupela i gat biknem, tasol mipela i gat nem nogut. ¹¹ Nau yet mipela i stap hangre na mipela i drai long wara, na mipela i werim klos i bruk, na ol man i wok long paitim mipela, na mipela i no gat ples bilong sindaun gut. ¹² Mipela i mekim hatpela wok long han bilong mipela yet. Taim ol man i tok bilas long mipela, mipela i save blesim ol. Taim ol i wok long bagarapim mipela, mipela i karim dispela hevi. ¹³ Taim ol i mekim tok nogut bilong daunim mipela, mipela i mekim gutpela tok bilong bekim ol. Nau yet mipela i stap pipia na rabis long ai bilong olgeta manmeri bilong dispela graun.

¹⁴ Mi no raitim dispela tok bilong semim yupela. Nogat. Yupela pikinini bilong mi na mi lavim yupela tumas na mi laik stretim yupela tasol. ¹⁵ Long wanem, ating planti manmeri tru i ken i bilipim na trastim Krais na ol i ken i stiaim yupela, tasol yupela no gat planti papa i stap.

Long Krai mi bin kamap papa bilong yupela, taim mi autim gutnius long yupela. ¹⁶ Em olsem na mi laik yupela lukim laip bilong mi na yupela bihainim. ¹⁷ Long dispela as mi bin salim Timoti i kam long yupela. Em i pikinini bilong mi na mi lavim em, na em i feifful long bihainim BIKPELA. Mi salim em i kam bilong kirapim gen tingting bilong yupela long laip na tisim bilong mi long wei bilong Krai Jisas, wankain olsem mi skulim olgeta sios long olgeta hap.

¹⁸ Sampela bilong yupela i bikhet, na ol i tingim olsem mi no inap i kam long yupela. ¹⁹ Tasol, sapos BIKPELA i orait long mi i kam, orait i no longtaim na bai mi kam, tasol mi no inap skelim toktok bilong ol dispela bikhet man, nogat, bai mi painimaut olsem, pawa bilong ol i olsem wanem. ²⁰ Long wanem, kingdom bilong God i no samting bilong toktok. Nogat. Em i samting bilong pawa. ²¹ Yupela laik wanem? Yupela laik mi kam stikim yupela, o yupela laik mi kam wantaim lavim na wantaim bel isi, a?

Rausim brata i mekim pasin i pamuk pasin.

5 ¹ Mi harim ripot olsem, i gat wanpela kain pamuk pasin i stap namel long yupela, na dispela kain pamuk pasin i no save kamap namel long ol haiden. Dispela pasin i olsem, wanpela man i kisim meri bilong papa bilong em. ² Na yupela apim yupela yet! Yupela no laik pulap long bikpela sori na rausim dispela man long kongregesen bilong yupela. ³ Tasol mi, long nem bilong BIKPELA Jisas bilong yumi, mi kotim pinis dispela man i mekim dispela pasin nogut. Tru, mi i stap longwe, tasol long spirit mi i stap wantaim yupela, na mi kotim em olsem mi i stap pinis wantaim yupela. ⁴ Olsem na, taim yupela bung na spirit bilong mi i stap na pawa bilong BIKPELA Jisas bilong yumi i stap, ⁵ orait yupela mas putim dispela man i go long sait bilong Satan, bai olupela bel bilong em i pinis na laip bilong em i stap seif long de bilong BIKPELA.

⁶ I no gutpela long yupela apim yupela yet. Ating yupela no save olsem, liklik hap leven bai mekim olgeta do i solap. ⁷ Yupela mas rausim olupela leven, bai yupela i ken i stap nupela do. Na yupela i stap nupela do pinis. Long wanem, Krai Em i pikinini sipsip bilong Abrusim na Em i dai pinis. ⁸ Em olsem na yumi bihainim pasin bilong Abrusim. Yumi no

ken i kaikaim bret i gat olupela leven. Olpela leven em i pasin bilong mekim nogut long ol narapela manmeri na ol kainkain pasin nogut. Yumi kaikaim bret i no gat leven. Bret i no gat leven em i pasin i trupela pasin na trupela toktok.

⁹ Long narapela pas mi bin raitim long yupela, mi bin tok olsem, "Yupela no ken i bung wantaim ol manmeri i mekim pamuk pasin." ¹⁰ Mi no minim olsem, yupela no ken i bungim ol manmeri bilong dispela graun i mekim pamuk pasin, na ol manmeri i mekim mangal pasin na ol i konim ol manmeri, na ol manmeri i lotuim ol aidol. Nogat. Sapos yupela no laik bungim ol dispela kain manmeri, orait ating yupela mas lusim dispela graun olgeta. ¹¹ Tasol nau mi tokim yupela olsem, yupela no ken i bung wantaim wanpela man i tok, "Mi Kristen brata bilong yupela," tasol em i mekim pamuk pasin, o em i mangalim ol samting, o em i lotuim ol aidol, o em i tok baksait, o em i spak, o em i konim ol manmeri. Nogat. Na tu, yupela no ken i kaikai wantaim em.

¹² Em i no samting bilong mi bilong skelim ol manmeri i stap autsait long sios. Nogat. Tasol yupela i gat wok bilong skelim manmeri i stap insait. ¹³ God bai skelim ol manmeri i stap autsait. Olsem na, "*Rausim man nogut long kongregesen bilong yupela.*" (Lo 17:7.)

Wanpela brata i kotim narapela brata.

6 ¹ Sapos wanpela bilong yupela i gat toktok long narapela bilong yupela, orait em i ken karim dispela toktok i go long kot bilong ol autsait manmeri na maski long stretim dispela toktok namel long ol brata bilong sios, a? Nogat! ² Ating yupela no save, ol manmeri bilong God bai skelim ol autsait manmeri bilong dispela graun. Na sapos yupela bai skelim ol autsait manmeri bilong dispela graun, orait olsem wanem yupela no fit long skelim ol liklik samting bilong nau? ³ Ating yupela no save, yumi bai skelim ol ensel. Na sapos yumi bai skelim ol ensel, orait yumi inap tru long skelim ol liklik samting i kamap nau long laip bilong yumi. ⁴ Em olsem na sapos sampela toktok i kamap namel long yupela bilong sios, orait olsem wanem yupela i go long ol autsait man bilong harim kot, em ol man i samting nating bilong sios? ⁵ Mi mekim dispela tok bilong semim yupela. Long sios bilong yupela ating i no gat ol

sampela man i gat save inap long skelim kot bilong tupela bilip manmeri, a? ⁶ Em olsem tasol wanpela brata i karim hevi bilong em long narapela brata i go long kot bilong lo, na long ai bilong ol manmeri i no bilip ol i autim hevi bilong ol!

⁷ Yupela feil pinis. Long wanem, yupela i gat kot kot i stap namel long yupela. Taim wanpela brata i rongim yu, olsem wanem yu no laik karim dispela rong tasol? Taim wanpela brata i konim yu, olsem wanem yu no laik karim dispela hevi tasol? ⁸ Na yupela, yupela wokim giaman pasin na yupela wokim rong, na yupela mekim olsem long ol brata bilong yupela. ⁹ Ating yupela no save, ol manmeri nogut ol i no inap kisim kingdom bilong God. Yupela no ken i giamanim bel bilong yupela. Ol manmeri i mekim ol kainkain pamuk pasin, na ol manmeri i lotu long ol idol, na ol marit manmeri i mekim pasin pamuk, na ol 2-kina man, na ol man i mekim marit pasin wantaim narapela man, ¹⁰ na ol stilmanmeri, na ol manmeri i tok baksait, na ol kon manmeri, ol i no inap kisim kingdom bilong God. ¹¹ Na pastaim sampela bilong yupela i bin i stap olsem. Tasol, long wok bilong BIKPELA Jisas Krai na long Holi Spirit bilong God bilong yumi, God i wasim yupela, na Em i mekim yupela holi manmeri, na Em i givim stretpela pasin long yupela bilong kolim yupela "stretpela manmeri".

Kainkain pasim pamuk i kamap bikpela.

¹² "Olgeta samting i orait long mi na mi ken i mekim." Tasol, i no olgeta samting i gutpela. "Olgeta samting i orait long mi na mi ken i mekim." Tasol, mi no inap larim wanpela samting i winim mi. ¹³ "Kaikai i stap bilong pulapim bel, na bel i stap bilong pulimapim long kaikai." Na God bai distroim tupela wantaim. Tasol bodi i no samting bilong yusim long ol kainkain pasin pamuk. Nogat. Bodi i stap bilong yusim long BIKPELA, na BIKPELA i givim Em yet bilong bodi. ¹⁴ God, long pawa bilong Em, Em i kirapim BIKPELA long dai, na Em bai kirapim yumi tu. ¹⁵ Ating yupela no save, bodi bilong yupela em i hap bodi bilong Krai yet. Em olsem na, olsem wanem mi ken i kisim hap bodi bilong Krai na pasim wantaim 2-kina meri? Mi no ken i mekim! ¹⁶ Ating yupela no save, sapos wanpela man i pasim bodi bilong em long 2-kina meri, orait em i

kamap wanpela wantaim em. Long wanem, Tok bilong God i tok olsem, "*Tupela bai kamap wanpela bodi.*" (*Jenesis 2:24*)¹⁷ Tasol man i pasim em yet wantaim BIKPELA em i kamap wanpela wantaim Em long spirit.

¹⁸ Ranawe olgeta long olgeta kainkain pamuk pasin. Ol narapela sin man i mekim em i no samting bilong bodi, tasol man i mekim pamuk pasin em i mekim samting i winim bodi bilong em yet.¹⁹ Ating yupela no save, bodi bilong yu em i tempel bilong Holi Spirit, na God i givim Holi Spirit long yu na Em i stap insait long yu. Yu no bilong yu yet. Nogat.²⁰ God i baim yu long pe. Em olsem na, yupela mas onarim God long bodi bilong yupela.

Pol i bekim tok bilong ol samting bilong marit.

7¹ Orait, nau mi laik bekim tok yupela i bin raitim long pas. Yupela i tok, "Em i gutpela long man na meri tupela i no ken i slip wantaim."² Tasol, pamuk pasin i kamap bikpela. Olsem na, mobeta ol wanwan man i gat meri bilong em yet, na ol wanwan meri i gat man bilong em yet.³ Man i no ken i pasim bodi bilong em na tok "nogat" long meri bilong em, na meri i no ken i pasim bodi bilong em na tok "nogat" long man bilong em.⁴ Bodi bilong meri, em i no bilong em wanpela tasol. Nogat. Em bilong man bilong em tu. Na wankain olsem, bodi bilong man, em i no bilong em wanpela tasol. Nogat. Em bilong meri bilong em tu.⁵ Wanpela i no ken i pasim bodi bilong em na tok "nogat" long narapela. Tasol, mebi sampela taim, sapos tupela marit i wanbel, orait yutupela ken i pasim marit pasin liklik taim, bai yutupela i ken i pas olgeta long prea. Tasol bihain yutupela mas i pas gen long marit pasin. Long wanem, nogut yu no strong long kontrolim tingting bilong yu long marit pasin na Satan i grisim yu long mekim pasin i paul.

⁶ Mi mekim dispela tok bilong tok orait long yupela long pasim marit pasin liklik taim, mi no tok olsem em i wanpela lo yupela mas bihainim.⁷ Long tingting bilong mi, mi laik ol manmeri i stap olsem mi. Tasol, God i givim kainkain strong long ol wanwan manmeri. Wanpela i gat strong long wanpela samting na narapela i gat strong bilong narapela samting.

⁸ Orait, mi mekim tok nau long ol man i no marit na long ol wido meri. Sapos ol i stap singel olsem nau mi i stap, orait dispela em i gutpela. ⁹ Tasol, sapos ol i no kontrolim bodi bilong ol yet, orait mobeta ol i marit. Nogut tingting bilong ol bilong mekim marit pasin i kilim ol. Olsem na, mobeta ol i marit.

¹⁰ Orait, mi givim wanpela lo nau long ol marit manmeri. Em i no mi i givim, Em i BIKPELA i givim. Na dispela lo i olsem, meri em i no ken i lusim man bilong em. ¹¹ Tasol, sapos em i lusim man bilong em pinis, orait em mas i stap singel o em i ken i go bek long man bilong em na oraitim marit bilong em, na em tasol. Na man em i no ken i katim marit na rausim meri bilong em.

¹² Mi mekim tok nau long ol narapela marit manmeri. Mi yet i tok, Em i no BIKPELA. Sapos wanpela brata em i marit long meri i no bilip, na meri i wanbel long i stap wantaim em, orait em i no ken i katim marit na rausim meri bilong em. ¹³ Na sapos wanpela sista em i marit long man i no bilip, na man i wanbel long i stap wantaim em, orait em i no ken i katim marit na rausim man bilong em. ¹⁴ Long wanem, man i no bilip em i klin bikos meri bilong em, em i bilipmeri na em i klin. Na meri i no bilip em i klin bikos man bilong em, em i bilipman na em i klin. Sapos i no olsem, orait pikinini bilong yupela i no inap i stap klin. Tasol, em i olsem na ol i klin. ¹⁵ Tasol, sapos man i no bilip i laik lusim bilipmeri bilong em, o meri i no bilip i laik lusim bilipman bilong em, orait em i ken i lusim. Wanpela brata o wanpela sista i no kalabus long em. God i singautim yumi bilong wokim bel isi pasin. ¹⁶ Sista, yu no ken i save, pasin bilong yu bai sevim man bilong yu o nogat. Na brata, yu no ken i save, pasin bilong yu bai sevim meri bilong yu o nogat.

BIKPELA i singautim yumi long bihainim Em.

¹⁷ Em olsem tasol mobeta yupela no senisim sindaun bilong yupela. Hau yupela sindaun taim BIKPELA i singautim yupela, orait yupela sindaun olsem na bihainim Em. Mi putim dispela lo long olgeta sios.

¹⁸ Sapos BIKPELA i singautim wanpela man na em i man i katim skin bilong em pinis, orait em i no ken i kamap man i no katim skin bilong em. Na sapos BIKPELA i singautim wanpela man na em man i no katim

skin bilong em, orait em i no ken i katim skin bilong em. ¹⁹ Long wanem, man i katim skin o man i no katim skin, dispela em i samting nating tumas. Tasol, pasin bilong bihainim tok bilong God em i bikpela samting. ²⁰ Yupela wanwan, yupela i stap olsem wanem taim BIKPELA i singautim yupela, orait yupela i stap olsem tasol. ²¹ Sapos yu i stap wanpela slev na BIKPELA i singautim yu, orait yu no ken i tingting planti. Tasol, sapos yu ken i kisim fridom bilong yu, orait yu kisim. ²² Long wanem, man i stap slev na BIKPELA i singautim em, orait em i fri man bilong BIKPELA. Na wankain olsem, man i stap fri na BIKPELA i singautim em, orait em i slev bilong Krai. ²³ Krai i baim yupela long bikpela pe stret, olsem na, yupela no ken i larim ol man i bosim yupela. ²⁴ Em olsem na, ol brata, yupela i stap olsem wanem taim BIKPELA i singautim yupela, orait yupela i stap olsem tasol wantaim God.

Pol i mekim tok long yangpela manmeri i no marit yet.

²⁵ Orait, mi mekim tok nau long ol yangpela man na ol yangpela meri ol i makim bilong marit. Mi no kisim wanpela tok long maus bilong BIKPELA long dispela samting. Tasol mi bai autim skelim bilong mi, na long marimari bilong BIKPELA long laip bilong mi, yupela ken i trastim tok bilong mi. ²⁶ Nau i gat ol bikpela hevi i wok long kamap, na mi skelim na mi tingim olsem, hau yupela i stap nau, orait mobeta yupela i stap olsem tasol. ²⁷ Sapos ol i makim pinis wanpela meri bilong yu, orait yu no ken i lusim em. Na sapos ol i no makim pinis wanpela meri bilong yu, orait yu no ken i painim meri. ²⁸ Tasol, sapos yu gohet na marit, orait yu no mekim sin. Na sapos meri ol i makim pinis bilong marit em i gohet na marit, orait em i no mekim sin. Tasol ol manmeri i marit, ol bai lukim planti hevi, na dispela tok mi mekim em bilong sevim yupela long ol dispela hevi. ²⁹ Ol brata, mi minim olsem, taim God i makim em i sotpela. Olsem na, nau ol man i gat meri ol i mas i stap olsem ol i no gat meri. ³⁰ Na ol man i krai sori ol i mas i stap olsem ol i no krai sori. Na ol man i amamas ol i mas i stap olsem ol i no amamas. Na ol man i baim ol samting ol i mas i stap olsem ol i no gat wanpela samting bilong ol i stap. ³¹ Na ol man i bisi long ol samting bilong dispela graun ol i mas

i stap olsem ol i no bisi long dispela samting. Long wanem, ol samting nau bilong dispela graun i wok long pinis.

³² Mi laik yupela i stap fri long tingting planti. Man i no marit em i ken i putim tingting bilong em i go long ol samting bilong BIKPELA na hau em i ken i mekim pasin BIKPELA i laikim. ³³ Na man i marit em i mas putim tingting bilong em i go long samting bilong dispela graun na hau em i ken i mekim pasin meri bilong em i laikim. ³⁴ Olsem na tingting bilong em i go long tupela samting. Na meri i no marit o yangpela meri ol i makim bilong marit, em i ken i putim tingting bilong em i go long ol samting bilong BIKPELA na hau em i ken i mekim pasin i holi long bodi na spirit bilong em. Na meri i marit em i mas putim tingting bilong em i go long samting bilong dispela graun na hau em i ken i mekim pasin man bilong em i laikim. ³⁵ Mi mekim dispela tok bilong helpim yupela na mi no minim long banisim yupela. Mi laik strongim yupela long wokabout long rot i stret tasol na strongim yupela bai tingting bilong yupela i stap isi na yupela i ken i pas olgeta long BIKPELA.

³⁶ Sapos wanpela man i tingim olsem, "Mi no mekim stretpela pasin long meri ol i bin makim bilong mi." Na sapos bel bilong em i kirap na em i tingim olsem, "Mi mas maritim em." Orait, em i ken i bihainim laik bilong em. Em i no mekim sin. Tupela i ken i marit. ³⁷ Tasol, sapos wanpela man i stretim tingting bilong em yet, na ol i no fosim em na em i fri bilong skelim laik bilong em yet, na long bel bilong em, em i wokim disisen pinis, na em i no laik maritim meri ol i bin makim bilong em, orait dispela man tu em i mekim pasin i stret. ³⁸ Em olsem na, man i maritim meri ol i bin makim bilong em, em i mekim gutpela pasin. Tasol, man i no maritim meri ol i bin makim bilong em, em bai mekim pasin i gutpela moa.

³⁹ Marit i pasim meri long man bilong em i go i go olgeta. Tasol, sapos man bilong em i dai pinis, orait em i fri long maritim wanem man em i laik maritim, tasol em i mas maritim man i pas long BIKPELA. ⁴⁰ Long tingting bilong mi, amamas bilong meri i stap nating tasol bai winim amamas bilong meri i marit gen. Na mi tingim olsem Spirit bilong God i stap long mi tu.

Ol i kaikaim ofa kaikai insait long tempel bilong ol aidol.

8 ¹ Orait, mi mekim tok nau long kaikai ol man i ofaim long ol aidol. Toktok yupela i mekim, mipela i klia pinis. Yupela i tok, "Mipela olgeta i gat save." Tasol, save i save kamapim bikhet pasin, na lavim i save strongim ol narapela. ² Sapos wanpela man i tingim olsem em i save, orait save bilong em i sot yet na em i gat wok yet bilong kisim save. ³ Tasol man i save lavim, orait dispela man i save trutru.

⁴ Em olsem na nau mi bai toktok long pasin bilong kaikaim ol kaikai ol man i ofaim long ol aidol. Mipela klia olsem, aidol em i samting nating olgeta na long dispela graun i gat wanpela God tasol i stap. ⁵ Tru, i gat planti samting ol i kolim "god" na ol i kolim "bikpela". Tasol maski ol sampela manmeri i tingim olsem ol dispela samting i stap long heven o i stap long graun, ⁶ bilong yumi wanpela God, Papa, tasol i stap. Na long Em olgeta samting i bin kam, na bilong Em yumi i stap. Na i gat wanpela BIKPELA, Jisas Krais, tasol i stap. Na long han bilong Em olgeta samting i bin kamap na long wok bilong Em yumi gat laip.

⁷ Tasol em i no olgeta manmeri i save long dispela samting. Sampela manmeri i bin lotu long ol aidol longpela taim pinis, olsem na, nau, taim ol i sindaun kaikaim kaikai ol man i ofaim long aidol, orait tingting bilong ol i kirap long aidol. Ol i no strong long tingting bilong ol, olsem na dispela pasin i bagarapim tingting bilong ol. ⁸ Na, kaikai i no inap kisim yumi i kam aninit long amamas o kros bilong God. Nogat. Sapos yumi no kaikai, orait dispela i no mekim yumi i stap nogut, na sapos yumi kaikai, orait dispela i no mekim yumi i stap gut. ⁹ Tasol, yupela mas lukaut. Nogut dispela kain fridom bilong yupela i pundaunim brata i wik. ¹⁰ Long wanem, sapos brata i stap na tingting bilong em i wik, na em i lukim yupela i gat save i sindaun kaikaim kaikai insait long tempel bilong ol aidol, orait tingting bilong brata i wik bai kirap na em bai i go tu na sindaun kaikaim kaikai ol man i ofaim long aidol. ¹¹ Em olsem na dispela brata i wik, em i brata Krais i bin lusim laip bilong Em bilong sevim, save bilong yupela i distroim em. ¹² Taim yupela mekim sin long ol brata bilong yupela long dispela pasin bilong yupela na yupela bagarapim tingting bilong ol, orait yupela i mekim sin long Krais. ¹³ Long dispela as, sapos samting mi kaikaim i mekim brata bilong mi i pundaun,

orait mi no ken i kaikai moa dispela mit, bai pasin bilong mi i no ken i pundaunim brata bilong mi.

Aposel Pol i gat namba.

9 ¹ Mi no gat fridom, a? Na mi no aposel, a? Na mi no bin lukim Jisas, BIKPELA bilong yumi, a? Na yupela no kaikai bilong wok bilong mi, wok mi mekim bilong BIKPELA, a? ² Sampela manmeri i tingim olsem, mi no aposel bilong ol, tasol maski, mi aposel bilong yupela, a? Long wanem, taim yupela bilip, orait yupela i olsem mak bilong soim olsem, mi trupela aposel bilong BIKPELA.

³ Yu husat i laik skelim mi, orait nau bai mi mekim tok long yupela bilong difenim mi yet. ⁴ Ating mi no gat rait bilong kisim kaikai na dring, a? ⁵ Ating mi no gat rait bilong maritim meri i bilip na kisim em raun wantaim mi, a? Ol narapela aposel i mekim olsem, na ol brata bilong BIKPELA i mekim olsem, na Sifas tu i mekim olsem. ⁶ O yupela tingim olsem, mi na Barnabas tasol i mas mekim wok bilong lukautim mitupela, na ol narapela aposel nogat, a?

⁷ Tingim. Husat i mekim wok soldia na em yet i painim kaikai bilong em? Na husat i planim gaden wain na em i no kaikaim frut bilong em? Na husat i lukautim ol sipsip na meme na em i no dringim susu bilong ol? ⁸ Na dispela toktok mi mekim em i samting bilong dispela graun tasol, a? Nogat. Lo i mekim dispela toktok. ⁹ Lo bilong Moses i tok, *"Yu no ken i banisim maus bilong bulmakau taim em i mekim wok bilong rausim skin bilong wit."* (Lo 25:4) Na yupela i gat wanem tingting, God i tingting long ol bulmakau tasol na Em i mekim dispela tok, a? ¹⁰ Yupela tingim olsem, God i no mekim dispela tok bilong skulim yumi, a? Harim. God i mekim dispela tok bilong skulim yumi. Em olsem na taim ol wokman i wok bilong brukim graun, na taim ol wokman i wok bilong rausim skin bilong wit, orait ol i ken i tingting long serim haves bilong wok bilong ol. ¹¹ Mipela i bin planim ol gutpela samting bilong spirit namel long yupela. Em olsem na long wanem as mipela no ken i kisim kaikai bilong bodi bilong mipela long yupela? ¹² Sapos ol narapela man i gat rait bilong kisim helpim bilong yupela, ating mitupela i mas i gat rait moa bilong kisim helpim bilong yupela, a?

Tasol, mipela no yusim rait bilong mipela na kisim helpim long yupela. Nogat. Mipela sot long wanem samting, em i orait, mipela i karim dispela hevi tasol, bai wanpela samting i no ken i pasim rot bilong gutnius bilong Krais. ¹³ Ating yupela no save, ol man i wok long tempel ol i kaikaim kaikai bilong tempel, na ol man i wok long alta ol i save serim kaikai ol i ofaim long alta. ¹⁴ Na long wankain pasin, BIKPELA i bin tok, ol man i autim gutnius ol i ken i kisim ol samting ol i nidim bilong laip long dispela wok bilong gutnius.

¹⁵ Tasol, mi no yusim dispela rait bilong mi na kisim ol samting long yupela. Na mi no raitim dispela tok bai yupela i givim helpim long mi. Nogat. Mobeta mi i dai pastaim. Nogut helpim bilong yupela i pasim rot long mi long kamapim biknem long gutnius. ¹⁶ Taim mi mekim wok bilong autim gutnius, orait i no gat as long mi yet i kisim biknem long dispela wok bilong mi. Long wanem, God i bin kamapim mi bilong autim gutnius, olsem na mi mas autim tasol. Na sapos mi no mekim dispela wok, orait mi ken i bagarap tasol. ¹⁷ Sapos mi fri na mi mekim wok, orait mi ken i kisim pe. Tasol sapos mi slev na mi mekim wok, orait mi mekim wok mi mas mekim tasol. ¹⁸ Em olsem na mi ken i kisim pe olsem wanem? Mi gat rait long kisim helpim bilong yupela, tasol mi no laik rait bilong mi i spoilim gutnius. Em olsem na taim mi autim gutnius, orait mi autim fri tasol na mi no kisim wanpela samting long yupela. Long dispela pasin mi mekim gutnius i fri i fri olgeta. Dispela gutpela samting em i olsem pe bilong mi.

¹⁹ Mi stap fri na mi no aninit long lek bilong wanpela man, tasol mi mekim mi yet i stap slev bilong olgeta manmeri, bai mi ken i kisim ol sampela manmeri moa i kam long gutnius. ²⁰ Em olsem na taim mi stap wantaim ol Juda, orait mi save bihainim pasin bilong ol Juda, bai mi ken i kisim ol i kam long gutnius. Na taim mi stap wantaim ol man i aninit long Lo, orait maski mi yet mi no aninit long Lo, mi save bihainim ol samting bilong Lo, bai mi ken i kisim ol i kam long gutnius. ²¹ Na taim mi stap wantaim ol man i no gat Lo, orait mi save stap olsem ol man i no gat Lo, bai mi ken i kisim ol i kam long gutnius. (Tasol yupela no ken i tingim olsem mi man bilong abrusim lo bilong God, nogat, mi aninit long lo bilong Krais.) ²² Na taim mi stap wantaim ol manmeri i wik, orait mi save bihainim pasin bilong ol manmeri i wik, bai mi ken i kisim ol i kam

long gutnius. Maski mi stap wantaim husat, mi save kamap olsem ol, bai mi ken i yusim olgeta samting bilong sevim sampela bilong ol. ²³ Mi mekim ol dispela kain pasin bilong gutnius tasol, bai mi ken i serim blesim bilong gutnius.

²⁴ Ating yupela no save, taim ol man i ran long resis, olgeta i ran, tasol wanpela man tasol i save kisim prais. Em olsem na yupela mas ran bilong kisim prais. ²⁵ Olgeta manmeri i laik pilai long gems ol i save strik tru long trenim bodi bilong ol. Ol i mekim olsem bilong kisim kraun, em i kraun i no inap i stap longpela taim. Tasol yumi mekim olsem bilong kisim kraun i stap oltaim oltaim. ²⁶ Em olsem na mi no save ran nating, na mi no pait olsem man i paitim win. ²⁷ Nogat. Mi paitim bodi bilong mi na mi mekim em i stap slev bilong mi. Nogut mi autim gutnius long ol narapela manmeri na bihain mi yet i lus long prais.

Pol i yusim histori bilong Israel bilong givim woning.

10 ¹ Long dispela as, ol brata, mi no laik yupela i longlong long tumbuna papa bilong yumi. Olgeta i bin i stap aninit long klaut na olgeta i brukim solwara. ² Na olgeta i pas long Moses taim ol i baptais long klaut na long solwara. ³ Olgeta i bin kaikaim kaikai i kamap long wanpela mirakel, ⁴ na olgeta i dringim wara i kamap long wanpela mirakel. Olgeta i bin dringim wara long ston i bin kamap long wanpela mirakel na i stap wantaim ol. Dispela ston i olsem Krai. ⁵ Em olsem tasol God i no amamas long planti bilong ol dispela manmeri, na det bodi bilong ol i stap nabaut long olgeta hap bilong deset.

⁶ Na ol dispela samting i kamap na i stap olsem wanpela tok piksa, bai yumi no ken i mangal long ol samting nogut olsem ol i bin mekim. ⁷ Yupela no ken i lotu long ol idol olsem sampela bilong ol i bin mekim. Tok bilong God i tok olsem, "*Ol manmeri ol i sindaun bilong kaikai na dring, na bihain ol i kirap bilong danis na pilai wantaim.*" (*Kisim Bek 32:6*) ⁸ Yumi no ken i mekim ol kainkain pamuk pasin olsem sampela bilong ol i bin mekim, na long wanpela de 23 tausen manmeri i dai. ⁹ Yumi no ken i traिम Krai olsem sampela bilong ol i bin mekim, na ol snek nogut i kilim ol. ¹⁰ Na yupela no ken i komplem olsem sampela bilong ol i bin mekim, na ensel bilong distroim i kilim ol.

¹¹ Ol dispela samting i kamap long ol na i stap olsem tok piksa, na ol i raitim long Buk, bilong givim woning long yumi, em yumi i stap nau long taim God i fulfilim olgeta bipo samting. ¹² Em olsem na, sapos yupela tingim olsem yupela i sanap strong, orait lukaut, nogut yupela i pundaun! ¹³ Ol traim i kamap long yupela em i no nupela samting. Nogat. Olgeta kain traim i bin kamap long bipo long manmeri bilong dispela graun. Na God Em i feitul, na Em i no inap kisim wanpela traim i kam na dispela traim i strongpela tumas bilong yupela. Tasol, taim traim i kamap long yupela, orait God bai kamapim rot tu bilong abrusim pundaun, bai yupela i ken i sanap strong aninit long traim.

No ken i kaikai long pati bilong idol na kaikai long Lordsapa tu.

¹⁴ Em olsem na, ol naispela pren bilong mi, yupela mas ranawe olgeta long lotu bilong ol idol. ¹⁵ Mi save olsem yupela gat het, olsem na yupela skelim dispela toktok mi mekim long yupela. ¹⁶ Yumi save tok tenkyu long kisim kap bilong tenkyu, na taim yumi serim dispela kap, orait yumi pasim yumi yet wantaim long blut bilong Krai, em olsem, a? Na bret yumi save brukim, taim yumi serim dispela bret, orait yumi pasim yumi yet wantaim long bodi bilong Krai, em olsem, a? ¹⁷ I gat wanpela bret tasol i stap, na long dispela as yumi i planti manmeri yumi i stap wanpela tasol. Long wanem, yumi wantaim yumi serim wanpela bret. ¹⁸ Skelim ol manmeri bilong Israel. Taim ol manmeri i serim na kaikaim ofa, orait ol i pas wantaim long God bilong dispela alta, a?

¹⁹ Na mi no minim olsem, kaikai ol haiden i ofaim long idol em i trupela samting, na mi no minim olsem, idol yet em i trupela samting. ²⁰ Nogat. Tasol, taim ol haiden i ofaim ol ofa, orait ol i mekim long ol spirit nogut. Ol i no mekim long God. Na mi no laik yupela i serim ofa na i pas wantaim ol spirit nogut. ²¹ Yupela no ken i dring long kap bilong BIKPELA na dring long kap bilong ol spirit nogut tu. Yupela no ken i serim tebol bilong BIKPELA na serim tebol bilong spirit nogut tu. ²² Ating yumi traim long kirapim jelas bilong BIKPELA, a? Ating strong bilong yumi i winim strong bilong Em, a?

Fridom bilong manmeri i bilip.

²³ “Olgeta samting i orait long mi na mi ken i mekim.” Tasol, i no olgeta samting i gutpela. “Olgeta samting i orait long mi na mi ken i mekim.” Tasol, i no olgeta samting i save strongim ol narapela. ²⁴ Yu no ken i tingting tasol long wokim ol samting bai yu yet i ken i stap gut. Nogat. Yu mas tingting long wokim ol samting bai ol narapela manmeri i stap gut.

²⁵ Wanem mit ol man i salim long maket, orait yupela no ken i tingting planti na askim ol kwesten. Nogat. Yupela kaikai tasol. ²⁶ Long wanem, “*Dispela graun em bilong BIKPELA, wantaim olgeta samting i stap long em.*” (*Buk Song 24:1*)

²⁷ Na sapos wanpela man i no bilip i invaitim yu long kam long haus bilong em na kaikai, na yu laik i go, orait wanem kaikai em i givim yu, yu no ken i tingting planti na askim ol kwesten. Nogat. Yu kaikai tasol. ²⁸ Tasol, sapos narapela visita i tok, “Dispela mit, ol i bin ofaim long aidol,” orait yu no ken i kaikai. Long wanem, pasin bilong yu bai helpim em i stap gut na helpim tingting i stap gut. ²⁹ Mi minim olsem, yu bai helpim tingting bilong dispela man i stap gut. Mi no minim olsem, yu bai helpim tingting bilong yu yet i stap gut.

Mi fri olgeta, na olsem wanem tingting bilong yupela i ken i kotim mi, a? ³⁰ Sapos mi kaikaim kaikai na mi tok tenkyu long God long dispela kaikai, orait olsem wanem yupela i daunim mi long kaikaim ol kaikai mi tok tenkyu long God long em pinis, a?

³¹ Em olsem na sapos yupela kaikai, o yupela dring, o yupela mekim wanem samting, orait olgeta samting yupela i mekim i mas pas long glori bilong God. ³² Yupela no ken i larim pasin bilong yupela i mekim wanpela man i pundaun, maski em i man Juda, o em i man Grik, o em i wanpela man bilong sios bilong God. ³³ Pasin mi mekim, mi mekim bilong amamasim olgeta manmeri long olgeta samting. Mi no mekim olsem bai mi yet i ken i stap gut. Nogat. Mi mekim olsem bai ol planti manmeri i ken i stap gut, na bai ol i ken i kisim laip.

11

¹ Yupela bihainim pasin bilong mi, olsem mi bihainim pasin bilong Krai.

Sampela meri i abrusim pasin bilong komyuniti.

² Mi ken i amamas long yupela. Long wanem, long olgeta samting yupela i save holim tingting long mi, na yupela i holimpas ol toktok olsem mi bin givim yupela.

³ Tasol, mi laik yupela mas save olsem, Het* bilong olgeta man em i Kraiss. Na Het bilong meri em i man. Na Het bilong Kraiss em i God. ⁴ Taim ol man i mekim prea o i mekim tok profet na em i karamapim het bilong em long laplap, orait em i semim Het bilong em. ⁵ Na taim ol meri i mekim prea o i mekim tok profet na em i no karamapim het bilong em, orait em i semim Het bilong em. I olsem het bilong em i stap skin nating. ⁶ Sapos meri i no laik karamapim het bilong em, orait em i mas gohet olgeta na katim gras bilong em sotpela. Tasol, em i sem samting bilong meri i katim gras bilong em sotpela o em i rausim gras bilong em na het i stap skin nating. Em olsem na mobeta em i karamapim het bilong em tasol.

⁷ Man i no ken i karamapim het bilong em long laplap. Long wanem, God i wokim man wankain olsem Em yet na em i glori bilong God. Tasol meri em i glori bilong man. ⁸ Long wanem, man em i no kamap long bodi bilong meri. Nogat. Meri em i kamap long bodi bilong man. ⁹ Na man i no kamap bilong meri. Nogat. Meri em i kamap bilong man. ¹⁰ Long dispela as, meri i gat fridom long het bilong em, tasol mobeta em i karamapim het bilong em, bilong rispektim God olsem ol ensel i mekim. ¹¹ Em olsem tasol, long femili bilong BIKPELA, meri em i no ken i abrusim man, na man i no ken i abrusim meri. ¹² Long wanem, meri i kamap long bodi bilong man, na man tu i kamap long bodi bilong meri. Tasol God i kamapim olgeta samting.

¹³ Yupela skelim. Em i gutpela pasin long meri i mekim prea na em i no karamapim het bilong em, a? Nogat. ¹⁴ Pasin bilong komyuniti i skulim yumi olsem, sapos man i gat longpela gras, orait dispela em i sem bilong em. ¹⁵ Tasol, sapos meri i gat longpela gras, orait dispela em i naispela samting tru bilong em. Long wanem, God i givim longpela gras long em bilong karamapim em. ¹⁶ Sapos wanpela man i laik tok pait long

* Pol i yusim dispela tok “Het” olsem yumi tok long “het bilong wara”.

ol dispela samting, orait harim, mipela no bihainim narapela pasin, na ol sios bilong God ol tu ol i no bihainim narapela pasin.

Pasin bilong Lordsapa.

¹⁷ Tasol, nau bai mi toktok long wanpela samting, na long dispela samting mi no amamas long yupela. Long wanem, taim yupela i kam bung wantaim, orait samting nogut i winim gutpela samting. ¹⁸ Pastaim, mi harim tok olsem, taim yupela kam bung na i stap sios, namel long yupela, yupela bruk hap hap. Ating dispela i mas tru. ¹⁹ Long wanem, pasin bilong bruk hap hap i mas kamap bilong soim ples klia husat i trupela manmeri. ²⁰ Taim yupela i kam bung wantaim, orait yupela kaikai, tasol em i no Lordsapa yupela i kaikai. ²¹ Long wanem, taim yupela kaikai, orait yupela wanwan yupela gohet na kaikaim kaikai na yupela no tingim ol narapela manmeri. Sampela i stap hangre, na narapela i dring planti. ²² Em olsem wanem? Yupela no gat haus bilong yupela yet na yupela kaikai na dring, a? Ating yupela tingim olsem sios bilong God em i samting nating na yupela semim manmeri i sot, a? Bai mi tok wanem long yupela? Bai mi amamas long yupela long dispela samting, a? Nogat, nogat tru!

²³ Long wanem, tok BIKPELA i mekim na i kam long mi, mi bin givim long yupela. BIKPELA Jisas, long nait Judas i putim Em long han bilong birua, Em i kisim bret, ²⁴ na taim Em i tok tenkyu pinis, Em i brukim bret na Em i tok, "Dispela em i bodi bilong Mi, na em bilong yupela. Yupela mekim olsem bilong holim tingting long Mi." ²⁵ Na long wankain pasin, taim ol i kaikaim kaikai bilong ol pinis, Em i kisim kap na em i tok, "Dispela kap em i nupela kontrak Mi mekim long blut bilong Mi. Taim yupela dringim, yupela mekim olsem bilong holim tingting long Mi." ²⁶ Long wanem, taim yupela kaikaim dispela bret na yupela dringim dispela kap yupela tokaut long dai bilong BIKPELA, na yupela i mekim olsem i go inap long taim bilong Em i kam.

²⁷ Em olsem na manmeri i kaikaim bret na dringim kap bilong BIKPELA long pasin i no stret, orait em i rongim bodi na blut bilong BIKPELA. ²⁸ Tasol, mobeta manmeri i skelim em yet pastaim na em i kaikaim bret na dringim kap. ²⁹ Long wanem, manmeri i kaikaim bret na

i dringim kap na em i no tingim ol manmeri bilong sios, orait taim em i kaikai na dring em i kisim kot i kam long em yet. ³⁰ Em olsem na long dispela as planti bilong yupela i wik na i kisim sik na sampela bilong yupela i dai pinis. ³¹ Tasol, sapos yumi skelim trutru yumi yet, orait hevi bilong kot i no inap i kam long yumi. ³² Taim BIKPELA i kotim yumi, orait Em i laik stretim yumi tasol, bai yumi no ken i bagarap olgeta wantaim ol manmeri bilong dispela graun.

³³ Em olsem na, ol brata bilong mi, taim yupela kam bung bilong kaikai wantaim, orait yupela kisim ol wanpela narapela. ³⁴ Sapos wanpela bilong yupela i laik kaikai planti, orait em i mas mekim long haus bilong em yet. Long wanem, nogut bung bilong yupela i kamapim kot long yupela.

Na taim mi kam long yupela, bai mi givim sampela toktok moa long yupela.

Ol wanwan strong Holi Spirit i wokim.

12 ¹ Orait, ol brata, nau mi laik toktok long ol sampela samting bilong Holi Spirit. Mi no laik yupela i longlong long dispela samting. ² Yupela save pinis, taim yupela i stap haiden yet, long sampela kain wei yupela bihainim lotu bilong ol aidol i no save toktok. ³ Em olsem na mi ken i tokim yupela, man i mekim toktok long strong bilong Holi Spirit em i no inap i tok olsem, "Jisas i ken i bagarap." Na man i tok, "Jisas Em i Bikipela," em i ken i mekim tasol long strong bilong Holi Spirit.

⁴ Orait, i gat kainkain strong Holi Spirit i save givim, tasol i gat wanpela Holi Spirit tasol. ⁵ Na i gat kainkain wok bilong gutnius, tasol i gat wanpela BIKPELA tasol. ⁶ Na i gat kainkain wei bilong mekim wok, tasol wanpela God tasol i wokim ol dispela samting long laip bilong ol manmeri. ⁷ Na Holi Spirit i givim hanmak bilong Em long ol wanwan manmeri, bilong helpim olgeta manmeri bilong kongregesen. ⁸ Long wanpela man, long wok bilong Holi Spirit, em i kisim strong na tokaut klia long trupela save. Long narapela man, long wok bilong dispela seim Holi Spirit, em i kisim strong na tokaut klia long trupela tok. ⁹ Long narapela man, long wok bilong seim Holi Spirit, em i kisim strong na

sanap long bilip. Na long narapela man, long wok bilong dispela wanpela Holi Spirit, em i kisim strong na oraitim sikman. ¹⁰ Long narapela man, em i kisim strong na wokim mirakel, na long narapela man, em i kisim strong na mekim tok profet, na long narapela man, em i kisim strong na skelim kainkain spirit, na long narapela man, em i kisim strong na spikim kainkain tok ples, na long narapela man, em i kisim strong na tanim na mekim klia kainkain tok ples. ¹¹ Dispela wanpela na seim Holi Spirit yet i wokim ol dispela kainkain strong, na long laik bilong Em yet Em i tilim i go kam long wanwan manmeri.

Wanpela bodi, tasol i gat planti hap bilong bodi.

¹² Wanpela bodi em i wanpela samting tasol. Tasol bodi i gat ol wanwan hap bilong em i stap. Planti hap bilong bodi i stap, tasol ol i fomim wanpela bodi tasol. Na i wankain long sios bilong Krai. ¹³ Long wanem, yumi olgeta yumi baptais long wanpela Holi Spirit na yumi kamap wanpela bodi. Maski yumi manmeri Juda o yumi manmeri Grik o yumi slev o yumi fri, yumi olgeta yumi dringim wanpela Holi Spirit. ¹⁴ Long wanem, bodi em i no gat wanpela hap bilong em i stap. Nogat. Planti hap bilong em i stap.

¹⁵ Sapos fut i tok, "Mi no han, olsem na mi no bilong bodi." Orait, em i tok olsem, tasol dispela i no minim olsem em i lus nau long bodi. Nogat. ¹⁶ Na sapos ia i tok, "Mi no ai, olsem na mi no bilong bodi." Orait, em i tok olsem, tasol dispela i no minim olsem em i lus nau long bodi. Nogat. ¹⁷ Sapos bodi em i ai tasol, orait hau na bai em i harim wanpela samting? Sapos bodi em i ia tasol, orait hau na bai em i smelim wanpela samting? ¹⁸ Tasol bodi i no stap olsem. Nogat. Taim God i wokim bodi, long skelim bilong Em yet, Em i bin putim olgeta wanwan hap bodi wantaim. ¹⁹ Sapos i gat wanpela hap bilong bodi tasol i stap, orait bodi bai olsem wanem? ²⁰ Tasol bodi i no stap olsem. Nogat. Bodi i gat planti hap bilong em i stap, tasol em i wanpela bodi tasol.

²¹ Na ai em i no ken i tokim han olsem, "Mi no nidim yu." Na het em i no ken i tokim fut olsem, "Mi no nidim yu." ²² Nogat. Hap bodi yumi tingim olsem em i no gat strong, bodi i nidim tru. ²³ Na hap bodi yumi tingim olsem em i samting nating, yumi save onarim. Na hap bodi

yumi tingim olsem em i samting bilong sem, yumi save lukautim gut na karamapim. ²⁴ Ol narapela hap bilong bodi yumi save larim i stap nating. Tasol God i lainim na pasim olgeta wanwan hap bodi wantaim, na Em i givim namba long ol hap bodi i no gat namba. ²⁵ Em i mekim olsem bai bodi i no ken i bruk nabaut, na bai olgeta hap bilong bodi, long wanpela level, i ken i lukautim ol wanpela narapela. ²⁶ Sapos wanpela hap i kisim hevi, orait olgeta hap i karim hevi wantaim em. Na sapos wanpela hap i kisim ona, orait olgeta hap i amamas wantaim em.

²⁷ Orait, yupela i bodi bilong Kraiss, na yupela wanwan yupela bilong bodi. ²⁸ Pastaim long sios God i putim ol man bilong mekim wok aposel, na sekon ol man bilong mekim wok profet, na ted ol man bilong mekim wok tisa. Orait na Em i putim ol man bilong mekim wok mirakel, na ol man i gat strong bilong oraitim sik, na ol man bilong helpim, na ol man bilong givim gutpela stia, na ol man bilong spikim kainkain tok ples. ²⁹ Olgeta i mekim wok aposel, a? Olgeta i mekim wok profet, a? Olgeta i mekim wok tisa, a? Olgeta i mekim wok mirakel, a? ³⁰ Olgeta i gat strong bilong oraitim sik, a? Olgeta i gat strong bilong spikim kainkain tok ples, a? Olgeta i gat strong bilong tanim na mekim klia kainkain tok ples, a? Nogat. ³¹ Tasol, mobeta yupela i laik kisim ol strong i nambawan.

Pasin bilong lavim em nambawan samting.

Orait, nau mi laik tokim yupela long wanpela wei na dispela wei em i nambawan tru.

13 ¹ Sapos mi spikim kainkain tok ples bilong manmeri na bilong ol ensel, tasol sapos mi no lavim manmeri, orait mi olsem wanpela belo i mekim planti nois o wanpela simbal i pairap nating. ² Na sapos mi gat strong bilong mekim tok profet, na sapos mi klia long olgeta samting i hait long ol narapela manmeri, na sapos mi gat bikpela save, na sapos mi gat strongpela bilip i ken i rausim ol maunten, tasol sapos mi no lavim manmeri, orait mi man nating tasol. ³ Sapos mi givim olgeta kago bilong mi long ol rabis manmeri, na sapos mi givim bodi bilong mi long paia, tasol sapos mi no lavim manmeri, orait mi westim taim bilong mi tasol.

⁴ Manmeri i lavim narapela manmeri, em i save bel isi long ol oltaim, na em i save mekim gutpela pasin long ol. Manmeri i lavim narapela manmeri em i no save jelas, na em i no save apim em yet, na em i no pilim olsem em yet em i bikpela. Nogat. ⁵ Na em i no save mekim pasin bilong givim sem long narapela manmeri, na em i no save mekim selfis pasin, na em i no save bel hat hariap, na em i no save holim tingting long rong ol i bin mekim long em. ⁶ Manmeri i lavim narapela manmeri em i no save amamas long pasin nogut bilong ol. Nogat. Em i amamas na wanbel long trupela tok. ⁷ Man i lavim narapela manmeri, em i save karim olgeta hevi, na em i save bilip i go i go, na em i save hop olgeta taim, na em i no save givap.

⁸ Pasin bilong lavim em i no inap pinis. Tasol, pasin bilong tok profet bai pinis, na pasin bilong spikim kainkain tok ples bai pinis, na pasin bilong tokaut klia long trupela tok bai pinis. ⁹ Nau yumi save hap hap tasol, na yumi autim tok profet hap hap, ¹⁰ tasol taim fulwan i kamap, orait pasin bilong hap hap bai pinis. ¹¹ Taim mi stap pikinini mi bin toktok olsem pikinini, na mi tingting olsem pikinini, na mi skelim olsem pikinini. Na taim mi kamap man mi bin lusim pasin bilong pikinini. ¹² Nau yumi lukim ol samting olsem yumi lukim long mira na i no klia olgeta, tasol bihain bai yumi i stap fes tu fes na olgeta samting bai klia olgeta. Nau mi save hap hap tasol. Bihain bai mi save fulwan, wankain olsem God i save long mi nau.

¹³ Em olsem na i gat 3-pela samting i stap, bilip na hop na pasin bilong lavim. Tasol pasin bilong lavim em i nambawan.

Mekim tok i klia olgeta bilong helpim olgeta manmeri.

14 ¹ Yupela mas strong long bihainim wei bilong lavim, na yupela mas laik tru long kisim ol strong Holi Spirit i save givim. Na i gutpela moa yupela i laik tru long kisim strong bilong mekim tok profet. ² Long wanem, man i spikim kainkain tok ples, em i no toktok long ol narapela manmeri, nogat, em i toktok long God tasol. Ol manmeri ol i no klia long toktok em i mekim. Long wanem, toktok em i mekim long strong bilong Holi Spirit em i no klia long ol manmeri. ³ Tasol man i mekim tok profet em i toktok long ol manmeri bilong strongim ol na bilong givim

gutpela tingting long ol na bilong helpim ol. ⁴ Man i spiking kainkain tok ples em i strongim em yet tasol, tasol man i mekim tok profet em i strongim olgeta manmeri bilong sios. ⁵ Mi laik yupela olgeta i spikim kainkain tok ples, tasol moa yet mi laik yupela i mekim tok profet. Man i mekim tok profet i winim man i spikim kainkain tok ples. Sapos wanpela man i tanim na mekim kainkain tok ples i kamap klia, em i orait. Long wanem, tok bilong em i ken i strongim olgeta manmeri bilong sios.

⁶ Em olsem na ol brata, sapos mi kam long yupela na mi spikim kainkain tok ples long yupela, orait bai mi helpim yupela olsem wanem? Mobeta mi tokim yupela long toktok God i bin soim mi o mi tokaut klia long trupela tok o mi mekim tok profet o mi mekim stia toktok. Ol dispela samting i ken i helpim yupela. ⁷ Sapos ol samting bilong mekim musik i stap, samting olsem flut na hap, na ol i pilaim na ol wanwan not i no klia, orait hau na bai yumi save ol i pilaim wanem song? ⁸ Na tu, sapos biugel i kra i kra i bilong em i no klia, orait husat bai redi long pa it? ⁹ Na wankain olsem long yupela. Sapos yupela no mekim toktok i klia long maus bilong yupela, orait hau na bai ol manmeri i save long as na minim bilong tok bilong yupela? Tok bilong yupela bai i lus nating. ¹⁰ I gat planti kainkain tok ples i stap long dispela graun, na olgeta i gat as na minim bilong em i stap. ¹¹ Tasol sapos mi no save long as na minim bilong tok ples wanpela man i spikim, orait em bai tingim olsem mi bilong narapela lain, na mi tu mi bai tingim olsem em bilong narapela lain. ¹² Na wankain olsem long yupela. Yupela i gat bikpela laik long kisim strong bilong Holi Spirit, orait yupela mas i gat bikpela laik bilong kisim strong i ken i strongim olgeta manmeri bilong sios.

¹³ Long dispela as man i spiking kainkain tok ples, em i mas prea long God i givim strong long em bilong tanim na mekim tok bilong em i kamap klia. ¹⁴ Long wanem, sapos mi mekim prea long kainkain tok ples, orait spirit bilong mi i mekim prea, tasol tingting bilong mi i no mekim prea. ¹⁵ Em olsem na bai mi mekim wanem? Mi bai prea long spirit bilong mi, tasol bai mi yusim tingting bilong mi tu na mi prea. Mi bai singim song long spirit bilong mi, tasol bai mi yusim tingting bilong mi tu na mi singim song. ¹⁶ Sapos yu no yusim tingting bilong yu wantaim, na yu mekim sampela tok tenkyu long God long strong bilong Holi Spirit, orait hau na bai man i no save long dispela tok ples i tok, "Tru tumas," a? Em i no inap

save long wanem toktok yu bin mekim. ¹⁷ Yu mekim gutpela tok tenkyu, tasol tok bilong yu i no strongim narapela manmeri.

¹⁸ Mi tok tenkyu long God, long wanem, planti taim mi spikim kainkain tok ples na mi winim yupela long dispela pasin. ¹⁹ Tasol, long sios, mobeta mi yusim tingting bilong mi na mi autim 5-pela tok i klia tru bilong helpim ol narapela manmeri, na maski mi spikim 10 tausen tok long kainkain tok ples.

²⁰ Ol brata, long tingting bilong yupela, yupela no ken i stap olsem yupela pikinini. Nogat. Long pasin nogut yupela ken i stap olsem yupela bebi, tasol long tingting bilong yupela, yupela mas i stap olsem yupela bikpela pinis. ²¹ Long Lo tok i stap olsem,

*"BIKPELA i tok,
Long kainkain tok ples,
na long maus bilong ol narapela lain manmeri,
bai Mi toktok long ol dispela manmeri.
Mi tokim ol, tasol ol i no harim na bihainim Mi." (Aisaia 28:11-12)*

²² Em olsem na pasin bilong spiking kainkain tok ples em i no sain bilong makim manmeri i bilip. Nogat. Em i sain samting bilong manmeri i no bilip. Tasol, pasin bilong mekim tok profet em i sain bilong makim manmeri i bilip. Em i no sain samting bilong manmeri i no bilip. ²³ Em olsem na sapos sios i bung na olgeta manmeri bilong sios i mekim pasin bilong spiking kainkain tok ples, na ol sampela autsait manmeri i no gat save o sampela manmeri i no bilip i kam bung wantaim yupela, orait ol bai tok olsem, "Yupela longlong." ²⁴ Tasol, sapos ol autsait manmeri i no gat save o ol manmeri i no bilip i kam bung wantaim yupela, na yupela olgeta i mekim tok profet, orait ol bai harim na kisim save long sin bilong ol na toktok yupela i mekim bai kotim ol ²⁵ na ol hait samting bilong bel bilong ol bai kamap ples klia. Em olsem na ol bai brukim skru na lotuim God na tok, "Tru tumas, God i stap wantaim yupela!"

Sios i mas kontrolim gut lotu bilong ol.

²⁶ Orait, ol brata, bai yumi tok wanem? Taim yupela bung yupela singim sampela lotu song, na yupela mekim sampela stia toktok, na yupela autim sampela tok God i bin soim yupela, na yupela mekim pasin

bilang spikim kainkain tok ples o yupela tanim na mekim klia kainkain tok ples. Yupela mas mekim ol dispela samting bilong strongim manmeri bilong sios. ²⁷ Sapos sampela bilong yupela i gat strong bilong mekim pasin bilong spikim kainkain tok ples, orait 2-pela o 3-pela tasol i ken i mekim. Tasol ol i no ken i mekim wantaim. Nogat. Wanpela i mas pinis pastaim na narapela i ken i mekim. Na wanpela bilong yupela i mas tanim na mekim klia toktok bilong em. ²⁸ Sapos i no gat wanpela man i stap bilong tanim tok bilong em, orait man i spikim kainkain tok ples em i mas pasim maus bilong em long sios. Em i stap wanpela em i ken i mekim toktok long God.

²⁹ Na 2-pela o 3-pela profet tasol i ken i toktok, na ol narapela manmeri ol i mas skelim gut tru toktok profet i mekim. ³⁰ Na sapos wanpela man i sindaun i stap na God i soim em wanpela toktok, orait man i sanap toktok em i mas pinis na larim narapela man i toktok. ³¹ Wanpela i pinis pastaim na narapela i ken i toktok na long dispela pasin yupela olgeta i ken i mekim tok profet na yupela olgeta i kisim save na yupela olgeta i kisim strong. ³² Ol man i mekim wok bilong mekim tok profet ol i save kontrolim spirit bilong ol yet. ³³ God Em i no God bilong kamapim sindaun i bruk. Nogat. Em i God bilong kamapim bel isi. Dispela pasin em i pasin i stap long olgeta kongregesen bilong manmeri bilong BIKPELA.

* ³⁴ Long olgeta sios ol meri mas i stap kwait. Ol i no ken i autim toktok na ol i mas i stap aninit long man olsem lo i tok. ³⁵ Sapos ol i laik kisim save long wanpela tok, orait taim ol i go bek long haus ol i ken i askim man bilong ol. Long wanem, meri i mekim toktok long sios em i sem samting.

³⁶ Na tok bilong God i kirap long yupela pastaim, a? Na tok bilong God i kam long yupela tasol na ol narapela manmeri nogat, a? ³⁷ Sapos ol sampela man i tingim olsem ol i profet o ol i kisim narapela strong Holi Spirit i save givim, orait ol i ken i tok klia olsem tok mi raitim long yupela em i lo bilong BIKPELA. ³⁸ Tasol, sapos ol i givim baksait long dispela samting, orait ol bai i stap long baksait.

* Ol sampela saveman i tingim aposel Pol i no raitim lain 34-35 na ol sampela man bihain i raitim na putim. Olsem na i gat kwesten mak i stap long lain 34-35.

³⁹ Em olsem na, ol brata bilong mi, kisim bikpela laik long mekim tok profet, na yupela no ken i tok nogat long pasin bilong spikim kainkain tok ples. ⁴⁰ Tasol, yupela mas wokim olgeta samting long gutpela na stretpela wei.

Kirap bek bilong Kraiss.

15 ¹ Ol brata, nau mi laik kirapim tingting bilong yupela long gutnius mi bin autim long yupela. Yupela i bin kisim dispela gutnius na yupela i sanap long em ² na long dispela gutnius God bai sevim yupela – sapos yupela holim strong tok mi bin autim long yupela. Tasol, nogut yupela giaman long bilip bilong yupela.

³ Na tok mi bin kisim mi bin givim long yupela. Dispela tok i paslain long ol narapela tok na i olsem, Kraiss Em i dai long sin bilong yumi olsem Tok bilong God i tok, ⁴ na ol i planim Em na long 3-pela de Em i kirap gen olsem Tok bilong God i tok. ⁵ Na Em i kamap long ai bilong Sifas na bihain Em i kamap long ai bilong olgeta disaipel na ol i lukim Em. ⁶ Na bihain Em i kamap long ai bilong ol planti brata na sista, namba bilong ol i winim 500, na wantaim ol i lukim Em. Planti bilong ol i stap yet na wanwan tasol i dai pinis. ⁷ Na Em i kamap long ai bilong Jems, na Em i kamap long ai bilong olgeta aposel na ol i lukim. ⁸ Na las Em i kamap long ai bilong mi na mi lukim. Ating mi olsem pikinini i bon long taim mama i no tingim. Tasol, Em i kamap long mi na mi lukim.

⁹ Ol narapela aposel i winim mi. Na mi no gutpela man na mi kisim nem "aposel". Long wanem, pastaim mi bin wok long distroim sios bilong God. ¹⁰ Tasol, long grasia bilong God, mi stap olsem mi stap. Na grasia God i givim mi i no stap nating long mi. Nogat. Mi wok hat moa na mi winim ol narapela aposel. Tasol, i no mi. Nogat. Grasia bilong God i stap wantaim mi na i wok long mi. ¹¹ Em olsem tasol maski mi tok o ol narapela aposel i tok, mipela olgeta i autim wanpela tok, na em i dispela tok yupela i bin kisim na bilipim.

Kirap bek bilong manmeri i bilip.

¹² Tok mipela i autim i mekim klia olsem Kraiss i bin kirap bek long matmat. Na olsem wanem sampela bilong yupela i tok, man i dai pinis i

no inap kirap bek? ¹³ Sapos man i dai pinis i no inap kirap bek, orait yupela mas tok olsem, Krai i no bin kirap bek. ¹⁴ Na sapos Krai i no kirap bek, orait autim tok bilong mipela i nogut na bilip bilong yupela i nogut tu. ¹⁵ Na tu, dispela i minim olsem, mipela i stap giaman witnis bilong God. Long wanem, mipela i tok witnis olsem, God i bin kirapim Krai long dai. Na sapos man i dai pinis i no inap kirap bek long dai, orait God i no bin kirapim Krai long dai. ¹⁶ Long wanem, sapos man i dai pinis i no inap kirap bek, orait Krai tu i no inap kirap bek. ¹⁷ Na sapos Krai i no kirap bek na i stap laip, orait bilip bilong yupela i samting nating, na yupela i stap yet long sin bilong yupela. ¹⁸ Long dispela pasin ol manmeri i bilipim na trastim Krai na i dai pinis, ol i lus. ¹⁹ Sapos wok bilong Krai i givim hop long yumi long dispela laip na em tasol, orait ol manmeri i ken i sori tumas moa long yumi.

²⁰ Tasol, i tru, Krai i bin kirap bek long dai, na Em i olsem fes kaikai bilong ol manmeri i bilipim na trastim Em na i dai pinis. ²¹ Long wanem, dai em i kamap long rot bilong wanpela man, na tu, kirap bek i kamap long rot bilong wanpela man. ²² Long rot bilong Adam ol i save dai. Na wankain olsem, long rot bilong Krai ol bai kirap bek na i stap laip. ²³ Tasol i gat wei bilong em i stap. Krai i olsem fes kaikai na Em i kirap bek, na bihain, taim Krai i kam, ol manmeri bilong Krai bai kirap bek. ²⁴ Long dispela taim, pinis bilong olgeta samting bai kamap, na taim Krai i distroim ol samting bilong bosim na ol samting i gat namba na ol samting i gat pawa, Krai bai givim kingdom i go bek long han bilong Papa God. ²⁵ I tru, Krai i mas bosim na kontrolim olgeta samting inap long Em i putim olgeta birua bilong Em aninit long lek bilong Em. ²⁶ Las birua Em bai distroim em i pasin bilong i dai. ²⁷ Na God i "bin putim olgeta samting aninit long lek bilong em." (Buk Song 8:6) Taim Tok bilong God i tok, God i putim "olgeta samting" aninit long lek bilong Krai, i klia olsem, God i no putim Em yet wantaim aninit long lek bilong Krai. Nogat. ²⁸ Na taim God i putim olgeta samting aninit long lek bilong Krai pinis, orait Pikinini Man bai i stap aninit long lek bilong God, na long dispela rot God bai i stap antap long olgeta samting olgeta.

²⁹ Em olsem na sapos i no gat pasin bilong kirap bek, orait ol manmeri i kisim baptais bilong ol man i dai pinis ol i mekim wanem? Sapos manmeri i dai pinis i no inap kirap bek, olsem wanem sampela

manmeri i kisim baptais bilong ol? ³⁰ Na olsem wanem mipela i orait long fesim ol trabel na hevi olgeta taim? ³¹ Olgeta de mi save fesim dai. Mi tok tru olsem i tru long mi autim amamas bilong mi long wok Krai Jisas, BIKPELA bilong yumi, i bin mekim long yupela long wok bilong mi. ³² Long Efesus mi pait long ol wel animal. Tasol sapos hop bilong mi i olsem ol man bilong dispela graun tasol, orait mi pait nating. Sapos i tru man i dai i no inap kirap bek, orait,

*"Nau yumi mas kaikai na dring na mekim amamas.
Long wanem, tumora laip bilong yumi bai ekspai."*

³³ Yupela no ken i larim ol man i paulim yupela. Harim. "Sapos gutpela man i poroman wantaim man nogut, orait man nogut bai paulim gutpela man." ³⁴ Yupela mas kisim bek gutpela tingting, na yupela mas lusim dispela sin pasin bilong yupela. Long wanem, sampela bilong yupela i no save gut long God. Mi mekim dispela tok bilong semim yupela.

Nupela bodi bilong bilip manmeri i kirap bek.

³⁵ Tasol, wanpela man bai tok olsem, "Manmeri i dai pinis bai kirap bek olsem wanem? Na bodi bilong ol bai i stap olsem wanem?"

³⁶ Dispela tok i longlong. Yu save, samting yu planim em mas i dai pastaim na bihain em bai kamap laip gen. ³⁷ Taim yu planim wit o ol narapela samting, yu no save planim bodi bilong em. Nogat. Yu planim sit tasol. ³⁸ Na God i kamapim bodi long sit. Wanem kain bodi God i makim bilong sit, orait dispela bodi bai kamap. Long kainkain sit God i givim kainkain bodi. ³⁹ Na olgeta bodi i no wankain. Nogat. Manmeri i gat narapela kain bodi, na ol animal i gat narapela kain bodi, na ol pisin i gat narapela kain bodi, na ol pis i gat narapela kain bodi. ⁴⁰ Na ol samting bilong antap i gat bodi bilong ol i stap, na ol samting bilong graun i gat bodi bilong ol i stap. Tasol glori bilong ol bodi bilong antap em i narapela kain na glori bilong ol bodi bilong graun em i narapela kain. ⁴¹ San i gat narapela kain glori bilong em i stap, na mun i gat narapela kain glori bilong em i stap, na sta i gat narapela kain glori bilong em i stap. Na ol sta yet i gat kainkain glori bilong ol i stap.

⁴² Na wankain olsem long manmeri i kirap bek long dai. Bodi ol i planim bai sting, tasol bodi i kirap bek bai i stap oltaim oltaim. ⁴³ Bodi ol i

planim em i samting bilong sem, tasol em bai kirap bek long glori. Bodi ol i planim em i wik, tasol em bai kirap bek long pawa. ⁴⁴ Bodi ol i planim em i bilong dispela graun, tasol bodi i kirap bek em i bilong nupela laip bilong spirit. Sapos i gat bodi i stap bilong dispela graun, orait i gat bodi i stap bilong nupela laip bilong spirit.

⁴⁵ Tok bilong God i tok olsem, "Fes Adam em i kamap man i gat laip i stap." (Jenesis 2:7) Na las Adam Em i spirit bilong givim nupela laip.

⁴⁶ Samting bilong nupela laip bilong spirit em i no kamap pastaim. Nogat. Samting bilong laip bilong dispela graun i kamap pastaim na bihain samting bilong nupela laip bilong spirit i kamap. ⁴⁷ Fes man em i bilong dispela graun na em i das samting. Na las Man Em i bilong heven. ⁴⁸ Hau fes man bilong dispela graun i stap, orait ol man bilong dispela graun i stap olsem em. Na hau dispela Man bilong heven i stap, orait ol manmeri bilong heven bai i stap olsem Em. ⁴⁹ Olsem nau mipela i stap wankain olsem dispela man bilong graun, orait bai mipela i stap wankain olsem dispela Man bilong heven.

⁵⁰ Ol brata na sista, mi tok klia long yupela olsem, dispela bodi bilong mit na blut i no inap i go insait long kingdom bilong God. Samting i ken i sting i no inap i go insait long samting bilong oltaim oltaim.

⁵¹ Harim. Bai mi tokaut long samting i bin hait. Mipela olgeta i no inap i dai, tasol mipela olgeta bai senis. ⁵² Taim las biugel i krai dispela samting bai kamap wantu stret. Biugel i krai na ol manmeri i dai pinis bai kirap na i stap oltaim oltaim, na mipela olgeta bai senis. ⁵³ Bodi bilong yumi i save sting, olsem na em i mas kamap bodi bilong i stap oltaim oltaim. Dispela bodi bilong i dai em i mas kamap bodi i no inap i dai. ⁵⁴ Taim dispela sting bodi bilong yumi i kamap bodi bilong i stap oltaim, taim dispela bodi bilong i dai i kamap bodi i no inap i dai, orait tok i stap em bai kamap tru, "God i winim dai na dai i no inap kamap moa." (Aisaia 25:8) Olsem na,

⁵⁵ *Hau na bai dai i winim ol manmeri?*

Hau na bai dai i givim pen moa long ol? (Hosea 13:14)

⁵⁶ Sin i kamapim pen bilong dai, na sin i kisim strong bilong em long lo bilong God. ⁵⁷ Tasol yumi ken i tok tenkyu long God. Long wanem, long wok bilong Jisas Krai, BIKPELA bilong yumi, dai i no inap winim yumi.

⁵⁸ Long dispela as, ol naispela brata na sista, yupela mas sanap strong na yupela no ken i larim wanpela samting i pundaunim yupela. Wok hat long wok bilong BIKPELA. Long wanem, wok yupela i mekim bilong BIKPELA i no inap lus nating.

Mani bilong helpim ol manmeri bilong God long Jerusalem.

16 ¹ Nau mi laik stori long mani yupela laik bungim bilong helpim manmeri bilong BIKPELA. Yupela ken i mekim wankain pasin mi bin tokim ol sios bilong provins Galesia. ² Long olgeta fes de bilong wik yupela olgeta wanwan yupela ken i bungim hap mani bilong yupela inap long hamas mani yupela save lukim. Orait yupela holim dispela mani i stap, na taim mi kam long yupela bilong kisim dispela mani, orait yupela no gat wok bilong painim na bungim mani. ³ Em olsem na taim mi kam long yupela, ol sampela man yupela wanbel long makim ol i ken i karim dispela presen i go long Jerusalem. Bai mi givim wanpela pas long ol na pas bai tokaut kliia olsem ol man i karim mani ol i husat. ⁴ Sapos yupela tingim olsem i gutpela long mi ken i go tu, orait mipela ken wokabaut wantaim.

Wokabaut bilong Pol.

⁵ Mi gat tingting long wokabaut long provins Masedonia pastaim na bihain mi kam long yupela. ⁶ Mebi mi ken i stap wantaim yupela longpela taim liklik o mebi mi ken i stap wantaim yupela inap long pinis bilong taim bilong kol. Em olsem na taim mi laik wokabaut i go long ol narapela hap, orait yupela ken i helpim mi redi bilong wokabaut bilong mi. ⁷ Mi no laik kam nau long yupela na i stap wantaim yupela liklik taim tasol. Mi laik i stap longpela taim liklik wantaim yupela, sapos BIKPELA i wanbel. ⁸ Tasol pastaim mi bai stap hia long taun Efesus i go inap long de Pentikos. ⁹ Long wanem, BIKPELA i bin opim rot pinis long mi bilong mekim gutpela wok bilong Em. Na planti manmeri i egensim mi.

¹⁰ Taim Timoti i kamap long yupela, orait yupela mas mekim gutpela pasin long em na em i no ken i pret long wanpela samting. Em i mekim wok bilong BIKPELA olsem mi mekim. ¹¹ Long dispela as wanpela bilong yupela no ken i lukdaun long em. Na taim em i laik lusim yupela,

orait yupela givim wanbel long em na helpim em na larim em i kam bek long mi. Long wanem, mi wetim em i kam wantaim ol sampela brata.

Las toktok.

¹² Nau mi laik stori long brata bilong yumi Apolos. Mi bin tok strong long em bai em i go long yupela wantaim ol narapela brata. Em i no laik go nau long yupela, tasol em bai go long narapela taim.

¹³ Yupela mas was gut na sanap strong long trupela bilip. Yupela mas i stap man tru na i stap strong. ¹⁴ Pasin bilong lavim i mas stiaim olgeta samting bilong yupela.

¹⁵ Yupela save pinis olsem, ol hauslain bilong Stefanos ol i fes manmeri bilong Akaia i bin tanim bel na bilipim na trastim gutnius. Na ol i pas olgeta long mekim wok long ol manmeri bilong BIKPELA. Ol brata na sista, mi laik tok strong long yupela olsem, ¹⁶ yupela mas i stap aninit long dispela kain manmeri na yupela mas i stap aninit long olgeta manmeri i pas long wok bilong God na i hatwok long em. ¹⁷ Mi amamas taim Stefanos na Fortunatus na Akaikus i bin kam long mi. Long wanem, samting yupela no helpim mi long em ol i bin helpim mi. ¹⁸ Ol i bin strongim spirit bilong mi na bilong yupela tu. Yupela mas luksave long dispela kain man na rispektim wok bilong ol.

Gritim bilong ol wanwan manmeri.

¹⁹ Ol sios bilong provins Esia ol i salim gritim bilong ol long yupela. Akwila na Prisila wantaim ol manmeri bilong sios i bung long haus bilong tupela ol i salim naispela gritim bilong ol long yupela. ²⁰ Na olgeta brata na sista bilong hia ol i salim gritim bilong ol long yupela. Na taim yupela gritim yupela yet yupela ken i givim kis i holi.

²¹ Mi Pol mi raitim dispela gritim bilong mi long han bilong mi yet.

²² Sapos wanpela man i no lavim BIKPELA, orait em i ken i bagarap. BIKPELA, mi laik Yu kam.

²³ Grasia bilong BIKPELA Jisas i ken i stap wantaim yupela.

²⁴ Mi lavim yupela olgeta i bilipim na trastim Kraus Jisas. Amen.